



KEMENTERIAN PERDAGANGAN DALAM NEGERI
DAN KOS SARA HIDUP

TEKS UCAPAN

YANG BERHORMAT SENATOR PUAN HAJAH FUZIAH BINTI SALLEH
TIMBALAN MENTERI PERDAGANGAN DALAM NEGERI
DAN KOS SARA HIDUP

SEMPENA

MAJLIS PELANCARAN PROGRAM FOOD BANK WAKAF RAHMAH
UNIVERSITI TENAGA NASIONAL (UNITEN)

PADA

7 MAC 2023 (SELASA) – 12.00 TENGAH HARI

TEMPAT

ARAS BAWAH, MASJID UNITEN,
UNITEN, SELANGOR.

Assalamualaikum WBT, Salam Sejahtera dan Salam Perpaduan,

Yang Berbahagia Datuk Roziah binti Abudin

Timbalan Ketua Setiausaha, KPDN (Perdagangan Dalam Negeri)

Yang Berbahagia Datin Roszanina binti Wahab

Timbalan Ketua Setiausaha (Pendayaupayaan Pengguna & Pengurusan)
Kementerian Perdagangan Dalam Negeri dan Kos Sara Hidup

Yang Berbahagia Datuk Azman bin Adam

Ketua Pengarah Bahagian Penguat Kuasa
Kementerian Perdagangan Dalam Negeri dan Kos Sara Hidup

Yang Berusaha Prof Madya Dr. Abdul Aziz Mat Isa

Timbalan Naib Canselor Hal Ehwal Pelajar dan Alumni UNITEN

YBrs. Tuan Zuhairi bin Mat Radey

Pengarah KPDN Negeri Selangor

Pegawai-Pegawai Kanan Kementerian dan Agensi Kerajaan

**Pensyarah-Pensyarah Kanan, Para Penyumbang, Para Pelajar dan
Barisan Media yang dihormati sekalian**

PENDAHULUAN

1. Alhamdulillah, bersyukur kita ke hadrat Allah SWT, kerana dengan limpah kurnia-Nya, dapat kita bersama-sama pada hari ini sempena **Majlis Pelancaran Program Food Bank Wakaf Rahmah Di Universiti Tenaga Nasional (Uniten)**. Terlebih istimewa lagi instrument yang kita gunakan untuk menggerakkan Foodbank ini adalah gabungan elemen wakaf untuk memperkukuhkan ekosistem food bank itu sendiri. Maka saya namakan inisiatif ini sebagai **Food Bank Wakaf Rahmah**. Yang pertama seumpamanya di Malaysia.
2. Terlebih dahulu, saya ingin merakamkan penghargaan kepada pihak Kementerian Perdagangan Dalam Negeri dan Kos Sara Hidup yang banyak membantu memberikan nasihat berkaitan proses penyediaan dan juga mempermudah pelaksanaan inisiatif yang amat bermakna ini. Penghargaan tidak terhingga juga kepada Universiti Tenaga Nasional (UNITEN) kerana sudi memberi ruang dan bersama-sama membantu menjayakan majlis kita pagi ini.

Hadirin yang dihormati sekalian,

MENYANTUNI PELAJAR IPT

3. Gagasan yang dibawa oleh YAB Perdana Menteri melalui Kerajaan Perpaduan ini menitikberatkan aspek kebajikan serta kesejahteraan rakyat. Dalam konteks majlis pada hari ini, sudah tentu aspek kebajikan yang dimaksudkan adalah merujuk kepada para pelajar IPT. Dari semasa ke semasa pelbagai inisiatif telah diperkenalkan untuk manfaat

anak-anak pelajar. Jika boleh saya kongsi di sini **inisiatif Payung Rahmah yang digagaskan di KPDN**, antaranya **termasuklah memperkenalkan Menu Rahmah** iaitu makanan dengan nasi, protein dan sayur pada harga serendah RM5.00 **di 1,085 premis perniagaan** yang berdaftar dengan kami yang boleh diakses melalui laman sesawang menurahmah.kpdn.gov.my, Kafe Rahmah, Bakul Rahmah, Jualan Rahmah dan pemerkasaan inisiatif Food Bank Siswa melalui program Food Bank Wakaf Rahmah yang bertujuan untuk membantu meringankan kos sara hidup rakyat selain dapat mengurangkan pembaziran makanan. Program Food Bank ini telah rasmi dilancarkan di peringkat kebangsaan pada 22 Disember 2018 di Kompleks Penyayang, Pulau Pinang. **Sejak Ogos 2018 sehingga Ogos 2022, seramai 704,922 ahli isi rumah telah berjaya mendapat manfaat daripada program ini.**

4. Secara tidak langsung program ini telah berjaya **menyelamatkan 4,405 tan metrik lebihan makanan** dan merupakan satu program yang berterusan dan bukan bersifat sementara (ad hoc)
5. Susulan Mesyuarat Majlis Tindakan Kos Sara Hidup Negara (NACCOL) pada 15 Februari pada tahun 2019 yang dipengerusikan ketika itu oleh YAB Timbalan Perdana Menteri iaitu Dato Seri Dr Wan Azizah Wan Ismail, kerajaan telah memutuskan untuk meluaskan Program Food Bank yang dikendalikan oleh Kementerian ke peringkat Institusi Pengajian Tinggi (IPT). Program Food Bank Siswa (PFBS) ini merupakan inisiatif Kementerian, Sekretariat Food Bank Malaysia, Rakan Strategik, Institusi Pengajian Tinggi, Pihak Penyumbang dan Penggerak Sukarelawan Pelajar.

- Objektif program ini adalah untuk membantu para pelajar dalam menangani kos sara hidup yang dihadapi oleh pelajar yang kian meningkat dan mengurangkan beban pelajar supaya mereka lebih menumpukan pada akademik serta memastikan para anak-anak kita di IPTA kenyang dengan makanan berkhasiat dan berkualiti.

Hadirin yang saya hormati sekalian,

- Pada hari ini, Kementerian melancarkan Program Food Bank Wakaf Rahmah di Universiti Tenaga Nasional (UNITEN) sebagai satu penambahbaikan kepada pelaksanaan PFBS dalam usaha membantu pelajar khususnya golongan B40 dan B10 (keluarga berpendapatan RM2,500 ke bawah). Program ini adalah kesinambungan daripada Program Food Bank Siswa yang dilaksanakan oleh Kementerian sejak Februari 2019.
- Sehingga kini, Program Food Bank Siswa telah diperluaskan kepada **29 IPT, Politeknik, serta Institut Pengajian Guru (IPG) dan telah membantu seramai 21,105 pelajar yang memerlukan.**
- Bagi pelaksanaan Program Food Bank Wakaf Rahmah di UNITEN, **seramai 1000 orang pelajar** yang memerlukan akan menerima manfaat daripada program ini. Konsep program ini adalah ***Food Pantry*** di mana UNITEN akan menyediakan tempat penyimpanan sumbangan makanan dari pihak penyumbang serta menyelaras pengagihan sumbangan kepada pelajar mengikut jadual yang telah ditetapkan.
- Kementerian juga telah melaksanakan Inisiatif Teknologi Pembungkusan Makanan Secara Retort yang melibatkan industri perhotelan, catering

dan pengeluar makanan. **Sebanyak dua belas (12) buah mesin retort sedang beroperasi di sepuluh (10) lokasi terpilih** di seluruh negara. Inisiatif ini disambut baik oleh ramai pihak dan membantu ramai golongan sasar khususnya mangsa bencana akibat banjir dan ia juga amat sesuai untuk pelajar yang menetap di dalam kampus.

11. Alhamdulillah, pada hari ini **Yayasan Wakaf Rahmah telah menyumbangkan satu buah mesin retort** untuk kegunaan memproses makanan retort dan membantu lebih ramai golongan yang memerlukan khususnya para pelajar IPT. Untuk makluman semua, mesin retort ini akan ditempatkan di Hotel Marriot Putrajaya sebagai Rakan Strategik KPDN dalam usaha mengurangkan pembaziran makanan dalam negara.

12. Inisiatif ini akan terus diperluaskan dalam Program Food Bank yang melibatkan mahasiswa di mana para pelajar yang memerlukan akan mendapat manfaat daripada makanan yang telah diretortkan ini yang bersifat *ready to eat*.

13. Kementerian juga turut berbesar hati dengan para penyumbang yang menyokong dan menjayakan Program pada hari ini dan seterusnya iaitu,

i KK Supermart & Superstore Sdn Bhd

ii Yayasan Al Manjie

iii Yayasan Food Bank Malaysia

iv Tamin Group

V Le Meridien Putrajaya

Vi Haseenah Foundation

Vii Mamee-Double Decker

Viii Lotus's Store

ix Nestle Products Sdn Bhd

Hadirin sekalian,

14. Apa makna rahmah? Rahmah itu adalah kasih sayang dalam Bahasa Arab. Dan istimewanya Islam tidak mendiskriminasi sifat rahmah itu hanya untuk orang Islam atau orang yang kaya, bahkan ia boleh dinikmati oleh orang bukan Islam termasuklah orang yang tidak berkemampuan. Maka saya fikir, inisitif yang diwujudkan ini insyaAllah manfaatnya bukan sekadar rakyat biasa, tetapi juga anak-anak siswa termasuklah kelompok B40 yang sentiasa berada dekat di hati kami.

15. Di UNITEN, alhamdulillah saya lihat pengurusannya dan Gerakan Siswa amat bertimbang rasa memberikan bantuan dan sumbangan kepada para siswa termasuklah kepada anak-anak kakitangan seperti yang berada di hadapan saya ini, kita amat mengharapkan lebih banyak universiti yang berkongsi visi dan aspirasi mendokong seruan kerajaan untuk membudayakan agenda saling berkongsi.

FOOD BANK WAKAF RAHMAH

16. Alhamdulillah, pada hari ini pula, satu lagi inisiatif akan dilancarkan kepada para pelajar IPT kita, bermula dengan UNITEN iaitu Food Bank

Wakaf Rahmah. Kalau nak diikutkan, termasuk UNITEN hari ini, kita sebenarnya mempunyai 28 Food Bank di IPT seluruh Malaysia. Ada satu lagi yang sedang dalam proses dan UNITEN adalah yang ke-30 dalam senarai panjang food bank siswa kami.

17. Namun istimewanya di UNITEN ini, ada elemen wakaf yang akan membezakan Food Bank Wakaf Rahmah di UNITEN dengan IPT yang lain. Baik, mari kita fahami dahulu bagaimana ekosistem Food Bank Wakaf Rahmah itu terjadi :

- 1) Kita ada KPDN yang menguruskan Food Bank;
- 2) Kita ada penerima di IPT di seluruh Malaysia (iaitu anak-anak siswa);
- 3) Kita ada Yayasan Wakaf yang menyumbang mesin retort (pemproses makanan “ready to eat” yang tidak perlu disimpan di dalam peti dan boleh bertahan selama 2 tahun di rak biasa);
- 4) Kita ada hotel yang mempunyai lebihan makanan yang tidak disentuh;
- 5) Kita ada Akta Perlindungan Penderma Makanan 2020 (yang akan menjadi jaminan kepada hotel yang sanggup memberikan lebihan makanan tadi); dan
- 6) Kita ada penyumbang yang sudi menjadi rakan strategik seperti yang sebutkan tadi;

18. Semuanya ini kita gabungjalinkan menjadi satu ekosistem yang saling melengkapi antara satu sama lain untuk ia kekal mampan dalam tempoh yang lama. Ada pemberi, ada penerima, ada akta, ada pengurus dan ada dananya yang hari ini **kita terima daripada Yayasan Wakaf sebanyak RM40,000 untuk membeli mesin retort yang sebelum ini menggunakan dana kerajaan.** Bermakna di UNITEN ini, KPDN telah membuat penjimatan bagi pelaksanaan Food

Bank Siswa sebanyak RM40,000 untuk kos pembungkusan makanan yang hendak diedarkan. Bayangkan jika wakaf rahmah ini berjaya membuat penjimatan di aspek ini hanya untuk satu universiti, maka saya percaya lebih banyak lagi kejayaan wakaf yang akan tercetus dengan model sebegini.

19. Justeru, saya mengharapkan jika hari ini UNITEN menerima wakaf daripada Yayasan Wakaf Malaysia, selepas ini dibangunkan lagi kempen berwakaf kepada staf atau ibu bapa yang berkemampuan melalui Tabung Amanah Zakat UNITEN dan Dana Wakaf Ilmu, esok-esok bolehlah hasilnya dikongsi semula dengan Yayasan Wakaf Malaysia untuk dinikmati oleh mahasiswa di universiti yang lain pula.

20. Saya fikir agenda yang sangat baik ini dapat diteruskan lagi dengan kita menyeru lebih ramai lagi penyumbang termasuklah wakil-wakil industri perhotelan, ayuh bersama kami untuk kita berganding bahu memberikan rahmah dan kasih sayang kepada rakyat. Jangan takut nak berkongsi kerana kita ada akta yang akan melindungi penyumbang makanan, jangan takut tidak mendapat pulangan kerana kita ada perlepasan cukai melalui Yayasan yang sudi memberikan bantuan. Ayuh bersama kita berganding bahu merapatkan saff untuk Malaysia Madani, yang lebih baik untuk didiami oleh anak dan cucu cicit kita di masa akan datang.

21. Saya juga amat menggalakkan agar penggerak iaitu anak-anak siswa MPP melalui Gerakan Kepenggunaan Siswa, untuk terus lebih proaktif untuk memastikan bekalan sentiasa mencukupi. Pihak penggerak harus pantas menghubungi pihak yang dapat membantu menyalurkan

bekalan mengikut keperluan mahasiswa masing-masing di kampus bagi mengelakkan bekalan terputus.

22. Saya berharap agar Program ini dapat dilaksanakan secara berterusan dan jaringan kerjasama bersama rakan-rakan strategik dipergiatkan lagi. Pihak Kementerian bersedia untuk menerima apa-apa cadangan dan maklum balas agar program ini dapat dilaksanakan dengan lebih berkesan.

23. Akhir kata, saya merakamkan setinggi-tinggi ucapan terima kasih kepada semua yang terlibat dan bekerjasama untuk program ini. Saya amat berharap program ini akan dapat dijayakan dengan lebih cemerlang dan berterusan sebagai inisiatif untuk membantu lebih ramai lagi pelajar yang memerlukan.

24. Dengan ini, saya merasmikan **PELANCARAN PROGRAM FOOD BANK WAKAF RAHMAH UNIVERSITI TENAGA NASIONAL (UNITEN) SELANGOR.**

Sekian, Terima Kasih.